

上海圖書館藏書

李士題



閩世編

胡
穰
安
題



閱世編目錄

卷一

天象 歷法 水利 災祥 田產一 田產二

卷二

學校一 學校二 學校三 學校四 學校五 禮樂 科舉一

科舉二 科舉三 科舉四 科舉五 科舉六

卷三

建設

卷四

士風 宦績 名節一 名節二

卷五

門祚一 門祚二

卷六

賦稅 徭役

卷七

食貨一 食貨二 食貨三 食貨四 食貨五 食貨六 種植

錢法

卷八

冠服 內裝 文章 交際

卷九

宴會 師長 及門 釋道

卷十

居第一 居第二 紀聞

閱世編卷一

葉夢珠輯

天象

易曰天垂象見吉凶聖人象之至治之世日月星辰行有常道次有常度無足紀也然而異日怪風中天已見或謂氣運使然未必全關人事春秋不書徵應殆爲是耶後世談占驗者莫精於劉向董子京房祖述而推廣言之鑿鑿卒無補于喪亂是果修救之無術歟抑數定不可挽歟要之天道遠人道邇不能盡人而不信天是無天也不能盡人而任天是無人也無天將太白入井而誣其渴亂亡固莫救矣無人如長星示變而勸之酒

災異其可弭乎予生也晚不獲睹景星慶雲之盛又不敢習天官言偶有見聞惟取法於春秋紀災不紀驗之意憶而紀之忘者闕焉至於徵應以俟明於理數者

崇禎三年庚午熒惑入東井退舍復羸居數月

四年辛未四月太白晝見熒惑再入鬼宿犯積屍氣

八年乙亥九月熒惑犯太微兩日並出或曰黑光摩盪也

兩日並見疑是九年事時有進述者潘師魯曰日

豈有二此卽所謂黑光摩盪也予從潘師乃九年非八年也或九年述八年事亦未可知

九年丙子六月夜有大星如斗光芒數十丈自西南東流聲如雷

十年丁丑正月朔日食春太白晝見六月太白經天

十一年戊寅二月朔日光摩盪竟日十一月五日日中有黑子黑氣摩盪

如兩日

十二年己卯正月三日日光摩盪自旦及暮五日日旁有青黑氣若戰十月一日彗星見朝廷修省免刑

十三年庚辰閏正月則正月六日猶十二月節也大雨震雷有如夏月九月望有兩日出沒

順治二年乙酉六月時聞空中聲響如沸人皆謂之天愁又晴皎無纖雲而細雨沾濕

三年丙戌五月十六日早有二日相盪其一在南六月二十三日天星亂落如雨八月以後天鳴相繼

四年丁亥八月時聞天鳴惟初六夜尤甚西南聲沸如雷廿六日夜亦然

六年己丑十二月初五夜有黑虹貫于月下十九日夜大寒節雷電大作
七年庚寅十月辛巳朔午未之交日食將既予祭先初畢撤饌時忽冥如
薄暮或云直有見星處十一月二十九日戊寅冬至微雪降夜復震

八年辛卯六月二十乙丑夜有大星自北斗隕于南箕光芒數丈七月二
十四日己亥白露戌時有星大如斗孛於斗牛之間光芒丈餘照耀如雪
牛馬皆驚

十年癸巳七月時聞天鳴惟三十日癸亥日將暝四野聲沸如鳴風箏
十三年丙申閏五月十五壬戌月食六月初一戊寅日食十一月庚寅望
自申至酉月食既九月初十乙卯黑虹見

十四年丁酉正月一日甲辰朔日食十六己未望月食五月十五丁巳望

月食

十六年己亥三月二十六日丁巳申酉之交大星流于西南光芒數丈自天中起下至于地形如匹練聲如震雷六月初三壬辰黑虹見于昏之中天十六日乙巳酉末白虹見于中天自南亙北

十七年庚子九月初一日癸丑午後中天有大星如斗色赤隕于西南轟然有聲十五日丁卯酉末月食殆既內有紅光如火歷數刻而逆出

康熙三年甲辰正月十五戊寅望戌時月食殆既移時方出十一月初五壬辰冬至夜半彗星出東南上指數丈光芒如箒至十四日辛丑彗芒下指東北直至月終漸縮而光淡十二月戊午朔申初日食八分

四年乙巳四月二日戊午太白晝見以後時見

五年丙午五月十二日壬辰戌將末白虹貫月自東亙天直至西極

七年戊申正月二十八日丁卯彗星見光芒下指長數丈

八年己酉四月癸亥朔日食自未至申而復

十一年壬子二月二十五日辛丑大雨雹予方讀書于張氏不窺軒中
午未之間忽然雨雹大者如胡桃小者如龍眼頃刻庭間積與堦齊

十二年癸丑正月五日丙子震雷十一月六日辛未酉刻雷電大作時予
在郡城旅館見之

十三年甲寅十一月二日辛酉未刻黑虹貫日東西亙天少頃而散

十五年丙辰六月九日庚申晝太白見于西方

十六年丁巳正月戊寅朔旦雷電俄而大雪十月二日京師星隕朝廷遣

使迹之得巨石有古文人莫能辨

十七年戊午四月二十三日壬辰未刻雨雹六月十三日壬午青氣竟天
朝廷下詔修省時予在江陰不及見歸閱邸抄知之八月初十日戊寅夜
天鳴四野聲沸如雷

十八年己未正月丁酉朔辰巳之間兩日疊見者久之一淺黑色一淡白
色是朝竟日光不射人十五日辛亥酉初刻雷電大作八月初二日甲子
京師地震甫息晚見兩日始而上下相鬪旣而兩日並行二十三日乙酉
山西鄉寧縣大雪凍死種植十月初一壬戌風雪閉天雷聲大作予在泖
上見之

十九年庚申六月十六日癸酉未時京師天鼓鳴自東南以至西北有白

氣一道下垂或云星隕也見邸抄十一月丙辰朔冬至越一日丁巳薄暮
長星見于西南自申及酉而沒形如匹帛白光數丈三四日後漸趨而北
上貫斗柄逾月不滅二十九日甲申夜分白虹亙天自西及東雲不能掩
二十年辛酉正月十五己巳望月食既

二十一年壬戌七月二十七日壬申起每夜彗星見于西南光芒四五丈
皇上面諭羣臣同加修省

二十二年癸亥正月十六日戊午月食自早至暮時聞雷聲立春後八日
也

二十三年甲子五月初十日乙亥太陽生耳十四日己卯月邊有白氣二
十二日丁亥起太白晝見京師有黑風雷電之異俱見邸抄

二十五年丙寅九月二十二日癸卯立冬夜雷電大雨

二十七年戊辰三月十五日戊子月食四月癸卯朔日食自辰至巳食幾六七分日色無光七月十四夜黑虹貫月八月初二日薄暮白虹貫日初三日黑虹貫日

二十八年己巳十一月初十日癸卯冬至前二日辛丑夜電光閃爍雷聲殷然先是六月十八日癸未午時余在筍里館中衆言太白經天皆于背陰處觀之星光炯然予雖望而不見然衆皆指示爲確見也十一月十八日辛亥夜酉時時雪初霽聞淅瀝聲疑爲雨霰啓戶視之星斗一天爛然無纖雲而雨灑不止食時始定先是月初東南有白氣一股自上下冲約長數丈吾鄉見者甚衆皆言下有二星星上生芒至上而漸闊但據邸報

欽天監所奏止言白氣不言三星也

三十一年壬申正月丁亥朔日食巳午之間余所見不過二分下午日色無光據筭里諸生云日食後有白氣縱橫出入于日中而黑光如日者數十相間上下于氣內尤異徵也

歷法

有明一代之大統歷其法本于元太史令郭守敬之授時歷一歲二十四氣及每月日之出入有時刻而無分晝夜十二時共應九十六刻以子午二時獨多二刻故分晝夜爲百刻月之上旬計日而無初字值日之建滿平收開成除危等列于二十八宿之上至詳且悉也迨後相沿日久氣候不無漸差以歷官拘守成法無變通傍救之材耳

本朝創興肇頒時憲歷日用西洋陪臣湯若望爲欽天監正依其國之算法凡逐月日之出入以及十二月之二十四氣俱各就京城省城準定卽日食月食之分數亦然似更較詳歷日面葉明刊欽天監欽奉上傳依西洋新法印造時憲歷日云云以昭一代大典若望錫號通微教師官加通政司使又加一級仍掌欽天監印務可謂知遇之極隆矣

康熙五年丙午退湯若望而以張其瀄爲監正始于歷面去欽奉上傳依西洋新法字樣仍倣授時大統歷法然而西洋法猶參用之未盡廢也康熙六年丁未以進士馬祐武舉楊光先爲欽天監正盡出西洋法悉因授時大統之制

八年己酉推定是歲閏十二月論者力辯其非改閏來年之二月以頒歷

在先不便重頒申飭天下不準本年之閏而仍俟來歲頒歷之閏爲準
九年庚戌閏二月是歲楊光先罷去馬祐超陞都御史巡撫江南而歷法
又變漸復西洋之制矣

十年辛亥更用西洋人南懷仁治理西歷法遂盡復西洋歷法以十二時
共九十六刻定日分直省定二十四氣及日之出入月之上旬仍加初字
改二十八宿于開成收閉等之上而以參商列宿之前特歷面仍如丙
午所頒止云欽天監奏准印造時憲歷頒行天下云云無欽奉上傳依西
洋新法等字樣至今因之

水利

淞郡濱海帶江漁鹽灌溉民命寄于水利然海水清濁甘鹹不一故沿海